

# 六祖壇經敦煌本

法海集記，道際編集

林崇安教授編校

佛法教材系列 W6

財團法人內觀教育基金會

## 〈六祖壇經敦煌本〉序

本書是六祖壇經〈敦煌本〉的校正本，由現存的〈旅博本〉、〈敦博本〉、〈英博本〉三個手抄本比對後完成，經文中的抄寫字，如「惠、於、与、將、從」等等都是直接錄自敦煌原文。六祖壇經敦煌本的三個抄本的經名都是《南宗頓教最上大乘摩訶般若波羅蜜經·六祖惠能大師於韶州大梵寺說法壇經一卷·兼授無相戒》，其傳承為：

〈法海後期本〉(714 頃) → 道際(際)抄本(720 頃) → 悟真 → 法興寺弟子 → 〈敦煌本〉(940 頃) → 旅博本(959 頃)、敦博本、英博本。

本書編校時，為了比對版本的內容，附帶標上〈德異本〉(內觀教育版)的「**基準十一品**」的名稱：【眾請說法品，悟法傳衣品，摩訶般若品，功德淨土品，定慧一體品，教授坐禪品，傳戒歸依品，參請機緣品，唐朝徵詔品，法門對示品，付囑流通品】，並於前七品每段落標上「**德異本編號**」：【A1】到【L3】，如此可以比照出不同版本之間的段落移動情形。

如果只是閱讀，則可不管「**基準十一品**」和「**德異本編號**」，因為全書是順著經文下排。本書校正時，也參考了各種壇經版本。文中刮號{}：表示於此內補充漏字或改正。

願此工作，有助於學佛者在義理和實踐上的增進。

林崇安 2021.03

於內觀教育禪林

## 六祖壇經敦煌本

### 目錄

眾請說法品	p. 4
悟法傳衣品	p. 4
定慧一體品	p. 8
教授坐禪品	p. 10
傳戒歸依品	p. 10
摩訶般若品	p. 13
功德淨土品	p. 17
參請機緣品	p. 20
唐朝徵詔品（無）	
法門對示品	p. 23
付囑流通品	p. 25

## 六祖壇經敦煌本

### 【經題】

南宗頓教取上大乘摩訶般若波羅蜜經  
六祖惠能大師於韶州大梵寺說法壇經一卷兼受無相戒  
弘法弟子法海集記

### 【眾請說法品】

#### 【A1】（德異本編號）

惠能大師於大梵寺講堂中，昇高座，說摩訶般若波羅蜜法，受無相戒。其時座下僧尼道俗一萬餘人，韶州刺史韋{璩}及諸官寮三十餘人、儒士{三十}餘人，同請大師說摩訶般若波羅蜜法。

#### 【A2】

刺史遂令門人僧法海集記，流行後代，與學道者，承此宗旨，遞相傳授，有所依約，以為稟承，說此壇經。

### 【悟法傳衣品】

#### 【B1】（德異本編號）

能大師言：善知識！淨心念摩訶般若波羅蜜法。

#### 【B2】

大師不語，自淨心神，良久乃言：

#### 【B3】

善知識！淨聽！

惠能慈父，本官范陽，左降遷流嶺南，{作}新州百姓。

惠能幼小，父亦早亡。老母孤遺，移來南海。艱辛貧乏，於市賣柴。忽有一客買柴，遂領惠能至於官店，客將柴去。惠能得錢，却向門前，忽見一客讀《金剛經》。

惠能一聞，心明便悟，乃問客曰：「從何處來，持此經典？」

客答曰：「我於蘄州黃梅縣東{馮茂山}，禮拜五祖弘忍和尚，見今在彼，門人有千餘眾。我於彼聽見大師勸道俗，但持《金剛經》一卷，即得見性，直了成佛。」

惠能聞說，宿業有緣，便即辭親，往黃梅{馮茂山}，禮拜五祖弘忍和尚。

#### 【B4】

弘忍和尚問惠能曰：「汝何方人，來此山禮拜吾？汝今向吾邊，復求何物？」

惠能答曰：「弟子是嶺南人，新州百姓，今故遠來禮拜和尚，不求餘物，唯求作佛。」

大師遂責惠能曰：「汝是嶺南人，又是獼獠，若為堪作佛？」

惠能答曰：「人即有南北，佛性即無南北，獼獠身與和尚不同，佛性有何差別？」

大師欲更共議，見左右在傍邊，大師更便不言，遂發遣惠能令隨眾作務。

時，有一行者遂差惠能，於碓坊踏碓八個餘月。

#### 【B5】

五祖忽於一日喚門人盡來，門人集{訖}。

五祖曰：「吾向汝說，世人生死事大，汝等門人終日供養，只求福田，不求出離生死苦海。汝等自性迷，福門何可救汝？」

汝忽且歸房自看，有智惠者，自取本性般若之智，各作一偈呈吾，吾看汝偈若悟大意者，付汝衣法，稟為六代。火急急！

門人得處分，却來各至自房，遞相謂言：「我等不須呈心用意作偈，將呈和尚。神秀上座是教授師，秀上座得法後自可依止。請不用作。」

諸人息心，盡不敢呈偈。

#### 【B7】（表示此段於德異本是在 B6 之後）

時大師堂前有三間房廊。於此廊下，供{奉}欲畫楞伽變，并畫五祖大師傳授衣法，流行後代為記。

畫人盧{珍}看壁了，明日下手。

#### 【B6】

上座神秀思惟：諸人不呈心偈，緣我為教授師。我若不呈心偈，五祖如何得見我心中見解深淺？我將心偈上五祖，呈意即善，求法覓祖不善，却同凡心奪其聖位。若不呈心偈，終不得法。

良久思惟，甚難甚難！甚難甚難！

#### 【B8】

夜至三更，不令人見，遂向南廊下，中間壁上，題作呈心偈，欲求衣法：若五祖見偈，言此偈{好}，若訪覓我，我見和尚，即云是秀作。

五祖見偈言不堪，自是我迷，宿業障重，不合得法，聖意難測，我心自息！

秀上座三更，於南廊下，中間壁上，秉燭題作偈，人盡不知。

偈曰：

身是菩提樹，心如明鏡臺，時時勤拂拭，莫使有塵埃。

神秀上座題此偈畢，歸房臥並無人見。

### 【B9】

五祖平旦遂喚盧供奉來南廊下畫楞伽變。

五祖忽見此偈，{讀訖}乃謂供奉曰：「弘忍與供奉錢三十千，深勞遠來，不畫變相也。《金剛經》云：凡所有相皆是虛妄。不如留此偈，令迷人誦。依此修行，不墮三惡，依法修行，有大利益。」

大師遂喚門人盡來焚香偈前，眾人見已，皆生敬心。

「汝等盡誦此偈者，方得見性，依此修行，即不墮落。」

門人盡誦，皆生敬心，喚言善哉！

五祖遂喚秀上座於堂內，{問}是汝作偈否？若是汝作，應得我法。

秀上座言：「罪過！實是神秀作，不敢求祖，願和尚慈悲看弟子有少智慧，識大意否？」

五祖曰：「汝作此偈，見解只到門前，尚未得入。凡夫依此偈修行，即不墮落。

作此見解，若覓無上菩提，即未可得。須入得門，見自本性。

汝且去一兩日思惟，更作一偈來呈吾，若入得門，見自本性，當付汝衣法。」

秀上座去，數日作不得。

### 【B10】

有一童子於碓坊邊過，唱誦此偈。惠能一聞，知未見性，即識大意。

能問童子：「適來誦者，是何言偈？」

童子答能曰：「你不知大師言：生死事大，欲傳衣法，令門人等各作一偈來呈。{若}悟大意，即付衣法，稟為六代祖。有一上座名神秀，忽於南廊下，書《無相偈》一首。五祖令諸門人盡誦。悟此偈者，即見自性。依此修行，即得出離。」

惠能答曰：「我此踏碓八箇餘月，未至堂前。望上人引惠能至南廊下見此偈禮拜，亦願誦取，結來生緣，願生佛地。」

**【B11】**

童子引能至南廊，能即禮拜此偈。為不識字，請一人讀。  
惠能聞已，即識大意。惠能亦作一偈，又請得一解書人，於西間壁上題著，呈自本心。不識本心，學法無益，識心見性，即悟大意。  
惠能偈曰：

菩提本無樹，明鏡亦無臺，佛性常清淨，何處有塵埃？

又偈曰：

心是菩提樹，身為明鏡臺，明鏡本清淨，何處染塵埃？

院內徒眾見能作此偈盡恠。惠能却入碓房。

**【B12】**

五祖忽來廊下，見惠能偈，即知識大意，恐眾人{損}，五祖乃謂眾人曰：此亦未得了。

**【B13】**

五祖夜至三更，喚惠能堂內說《金剛經》。惠能一聞，言下便悟。

**【B14】**

其夜受法，人盡不知。便傳頓法及衣以為六代祖。衣將為信稟，代代相傳；法以心傳心，當令自悟。

五祖言：「惠能！自古傳法，氣如懸絲，若住此間，有人害汝，汝即須速去！」

能得衣法，三更發去。

五祖自送能至九江驛，登時便別。

五祖處分：「汝去努力將法向南。三年勿弘，此法難去。在後弘化，善誘迷人，若得心開，與吾無別。」

**【B15】**

辭違已了，便發向南。兩月中間，至大庾嶺。不知向後有數百人来，欲擬捉惠能奪衣法，来至半路，盡忽却迴。

唯有一僧，姓陳名惠順，先是三品將軍，性行麤惡，直至嶺上，来趨把著惠能。即還法衣，又不肯取：我故遠來求法，不要其衣。

能於嶺上，便傳法惠順。惠順得聞，言下心開。

能使惠順即却向北化人。

### 【B16】

惠能來於此地，與諸官寮道俗，亦有累劫之因。  
教是先聖所傳，不是惠能自知。

### 【B17】

願聞先聖教者，各須淨心，聞了願自除迷，如先代悟。下是法。

### 【C1】

惠能大師喚言：善知識！菩提般若之智，世人本自有之。即緣心迷，不能自悟，須求大善知識示道見性。

善知識！愚人、智人，佛性本亦無差別，只緣迷悟，迷即為愚，悟即成智。

## 【定慧一體品】

### 【G1】（德異本編號）

善知識！我此法門，以定慧為本。第一勿迷，言惠定別。定慧躰一不二。即定是惠躰，即惠是定用。即惠之時定在惠。即定之時惠在定。善知識！此義即{定}惠等學。

學道之人作意，莫言：「先定後惠，先惠後定，定惠各別。」

作此見者，法有二相：口說善、心不善，惠定不等。

心口俱善，內外一種，定惠即等。自悟修行，不在口諍。

若諍先後，即是迷人。不斷勝負，却生法我，不離四相。

### 【G2】

一行三昧者，於一切時中，行住坐臥常行{直}心是。

《淨名經》云：「{直}心是道場，{直}心是淨土。」

莫心行諛曲，口說法直，口說一行三昧，不行{直}心，非佛弟子。

但行{直}心，於一切法上，無有執着，名一行三昧。

### 【G3】

迷人着法相，執一行三昧，{直言}：「坐不動，除妄不起心，即是一行三昧。」若如是，此法同無情，却是障道因緣，道須通流，何以却滯？心{不}住即通流，住即{自}縛。

若坐不動是，維摩詰不合呵舍利弗宴坐林中。

善知識！又見有人教人坐，看心看淨，不動不起，從此置功，迷人不悟，便執成顛。

即有數百般如此教道者，故知大錯。

【G4】

善知識！定惠猶如何等？如燈、光。有燈即有光，无燈即无光，燈是光之躰，光是燈之用，名即有二，躰無兩般，此定、惠法，亦復如是。善知識！法无頓漸，人有利鈍。迷即漸勸，悟人頓修。識自本心，{見自}本性，悟即元无差別，不悟即長劫輪迴。

【G5】

善知識！我{此}法門，從上已來，頓漸皆立无念為宗，无相為躰，无住為本。

【G6】

何{名无相？於}相而離相。

【G7】

无念者，於念而不念。

【G8】

无住者，為人本性，念念不住，前念、{今}念、後念，念念相續，無有斷絕。若一念斷絕，法身即離色身。念念時中，於一切法上無住。一念若住，念念即住，名{為}繫縛。

於一切法上，念念不住，即無縛也。{是}以无住為本。

【G9】

善知識！外離一切相，是無相。但能離相，性躰清淨，是以无相為躰。

【G10】

於一切境上不染，名為无念。於自念上離境，不於法上念生。

莫百物不思，念盡除却，一念斷即〔死〕，別處受生。

學道者用心！莫不識法意，自錯尚可，更勸他人迷，不自見迷，又謗經法，是以立无念為宗。

即緣迷人於境上有念，念上便起邪見，一切塵勞妄念從此而生。然此教門，立无念為宗。

世人離境不起於念。若无有念，无念亦不立。

无者，无何事？念者，{念}何物？无者，離二相諸塵勞。真如是念之躰，念是真如之用。

{自}性起念，雖即見聞覺知，不染万境而常自在，《維摩經》云：外能善分別諸法相，內於第一義而不動。

【G15】

善知識！此法門中坐禪，{亦}不看心，亦不看淨，亦不言{不}動。若言看心，心元是妄，{知心}如幻，故无所看也。

若言看淨，人性本淨，為妄念故，蓋覆真如，離妄念，本性淨。  
不見自性本淨，起心看淨，却生淨妄。  
妄無處所，故知看者 {是妄} 也。  
淨無形相，却立淨相，言是功夫，作此見者，障自本性，却被淨縛。  
若不動者，見一切人過患，{自}性不動。  
迷人自身不動，開口即說人是非，與道違背。  
看心、看淨，却是障道因緣。

### 【教授坐禪品】

【G11】（德異本編號）

今{既}如是，此法門中，何名坐禪？  
此法門中，一切無碍，外於一切境界上，念不起為坐；見本性不亂為禪。

【G12】

何名為禪定？外離相曰禪，內不亂曰定。  
外若有相，內性不亂，本性自淨自定，只緣境觸，觸即亂。  
離相不亂即定。  
外離相即禪，內外不亂即定。外禪內定，故名禪定。

【G13】

《維摩經》云：「即時豁然，還得本心。」《菩薩戒 {經}》云：「本源自性清淨。」

【G14】

善知識！見自性自淨，自修自作自性法身，自行佛行，自作自成佛道。

### 【傳戒歸依品】

【K1】（德異本編號）

善知識！忽須自躄與受無相戒。  
一時逐惠能口道，令善知識見自三身佛。  
於自色身，歸依清淨法身佛。  
於自色身，歸依千百億化身佛。  
於自色身，歸依當來圓滿報身佛。  
已上三唱

**【K2】**

色身是舍宅，不可言歸，向者三身在自法性，世人盡有，為迷不見，外覓三世如來，不見自色身中三世佛。

善知識聽！與善知識說！令善知識於自色身，見自法性有三世佛。此三身佛從此自性上生。

**【K3】**

何名清淨{法}身佛？善知識！世人性本自淨，萬法在自性：思量一切惡事，即行於惡行；思量一切善事，便修於善行，知如是一切法盡在自性。自性常清淨，日月常明，只為雲覆蓋，上明下暗，不能了見日月星辰。忽遇惠風，吹散卷盡雲霧，萬像參羅，一時皆現。世人性淨猶如青天，惠如日，智如月，智惠常明。於外{著}境，妄念浮雲蓋覆，自性不能明。故遇善知識開真正法，吹却迷妄，內外明徹，於自性中萬法皆現，一切法在自性，名為清淨法身。

自歸依者，除不善心及不善行，是名歸依。

**【K4】**

何名為千百億化身佛？不思量，性即空寂；思量即是自化。思量惡法，化為地獄；思量善法，化為天堂；毒害化為畜生，慈悲化為菩薩，智惠化為上界，愚癡化為下方。自性變化甚多，迷人自不知見。一念善，智惠即生。

**【K5】**

{何名圓滿報身佛？譬如}一燈能除千年闇，一智能滅萬年愚。莫思向前，常思於後，常後念善，名為報身

一念惡，報却千年善心。一念善，報却千年惡滅，無常已來，後念善，名為報身。

**【K6】**

從法身思量即是化身；念念善即是報身。

自悟自修，即名歸依也。

皮肉是色身舍宅，不在歸也。

但悟三身，即識大意。

**【I1】**

今既自歸依三身佛已，與善知識發四弘大願。

善知識！一時逐惠能道：

衆生無邊誓願度，煩惱無邊誓願斷，

法門無邊誓願學，無上佛道誓願成！三唱

【I2】

善知識！衆生无邊誓願度，不是惠能度。

善知識！心中衆生，各於自身自性自度。

何名自性自度？

自色身中，邪見、煩惱、愚癡、迷妄，自有本覺性，將正見度。既悟正見，般若之智，除却愚癡迷妄衆生，各各自度。邪來正度，迷來悟度，愚來智度，惡來善度，煩惱來菩{提}度，如是度者，是名真度。

【I3】

煩惱无邊誓願斷，自心除虛妄。

【I4】

法門无邊誓願學，學無上正法。

【I5】

无上佛道誓願成，常下心行，恭敬一切，遠離迷執，覺智生般若，除却迷妄，即自悟佛道成，行誓願力。

【H1】

（缺）。

【H2】

今既發四弘誓願訖，与善知識无相懺悔三世罪障

。大師言：善知識！前念、後念及今念，念{念}不被愚迷染從前惡行一時自性若除，即是懺悔。前念、後念及今念，念念不被愚癡染，除却從前矯{詐}心，永斷名為自性懺。前念、後念、今念，念念不被疽疾染，除却從前疾垢心，自性若除即是懺。已上三唱

【H3】

善知識！何名懺悔？{懺}者，終身不作；悔者，知於前非，惡業恒不離心，諸佛前口說无益，我此法門中，永斷不作，名為懺悔。

【J1】

今既懺悔已，与善知識受无相三歸依戒。大師言：

善知識！歸依覺，兩足尊。歸依正，離欲尊。歸依淨，衆中尊。

從今已後，稱佛為師，更不歸依餘邪迷外道。願自三寶慈悲證明。

【J2】

善知識！惠能勸善知識歸依三寶。

佛者，覺也。法者，正也。僧者，淨也。

【J3】

自心歸依覺，邪迷不生，少欲知足，離財離色，名兩足尊。

#### 【J4】

自心歸{依}正，念念无邪，故即无愛着，以无愛着，名離欲尊。

#### 【J5】

自心歸依淨，一切塵勞、妄念雖在自性，自性不染着，名眾中尊。

#### 【J6】

凡夫{不}解，從日至日受三歸依戒。若言歸佛，佛在何處？若不見佛，即无所歸，既无所歸，言却是妄。

善知識！各自觀察，莫錯用意，經中只言自歸依佛，不言歸他佛，自性不歸，无所{歸}處。

### 【摩訶般若品】

#### 【C2】（德異本編號）

今既自歸依三寶，惣各各至心，与善知識說摩訶般若波羅蜜法

善知識雖念不解，惠能与說，各各聽！

摩訶般若波羅蜜者，西國梵語，唐言大智惠彼岸到。此法須行，不在口念，口念不行，如{幻}如化。修行者，法身与佛等也。

#### 【C3】

何名摩訶？摩訶者是大，心量廣大，猶如虛空。

莫空心坐，即落无記空。

{虛空}能含日月星辰，大地山河，一切草木，惡人善人，惡法善法，天堂地獄，盡在空中。世人性空，亦復如是。

性含万法是大，万法盡是自性。見一切人及非人，惡之与善，惡法善法，盡皆不捨，不可染着，猶如虛空，名之為大，此是摩訶行。

迷人口念，智者心{行}。又有迷人，空心不思，名之為大，此亦不是。

心量大，不行是小。莫口空說，不修此行，非我弟子。

#### 【C4】

何名般若？般若是智惠。一時中，念念不愚，常行智惠，即名般若行。

一念愚，即般若絕；一念智，即般若生。

{世人}心中常愚，{自言}我修般若。般若无形相，智惠性即是。

#### 【C5】

何名波羅蜜？此是西國梵音，唐言彼岸到。

解義離生滅，着境生滅起，如水有波浪，即是於此岸。

離境无生滅，如水永長流，故即名到彼岸，故名波羅蜜。

### 【C6】

迷人口念，智者心行。當念時有妄，有妄即非真有。念念若行，是名真有。悟此法者，悟般若法，修般若行。

不修即凡，一念修行，法身等佛。

善知識！即煩惱是菩提。前念迷即凡，後念悟即佛。

### 【C7】

善知識！摩訶般若波羅蜜，最尊、最上、第一，无住、无去、无来，三世諸佛從中出。將大智惠到彼岸，打破五陰煩惱塵勞。

最尊、最上、第一：讚最上最上乘法，修行定成佛。

无去、无住、无来：是定惠等，不染一切法。

三世諸佛從中：變三毒為戒定惠。

### 【C8】

善知識！我此法門從{般若生}八万四千智惠。何以故？

為世人有八万四千塵勞。若无塵勞，般若常在，不離自性。

悟此法者，即是无念、无憶、无着。莫起{誑}妄，即自是真如性。

用智惠觀照，於一切法不取、不捨，即見性成佛道。

### 【C9】

善知識！若欲入甚深法界，入般若三昧者，直須修般若波羅蜜行。

但持《金剛般若波羅蜜經》一卷，即得見性，入般若三昧。

當知此人功德无量，經中分明讚嘆，不能具說。

此是最上乘法，為大智上根人說。

{小根之人}，若聞法，心不生信。何以故？

譬如大龍，若下大雨，雨於閻浮提，如漂草葉。若下大雨，雨放大海，不增不減。

### 【C10】

若大乘者，聞說《金剛經》，心開悟解，故知本性自有般若之智，自用智惠觀照，不假文字。

譬如其雨水，不從天有，元是龍王於江海中，將身引此水，令一切衆生、一切草木、一切有情无情，悉皆蒙潤，諸水衆流，却入大海，海納衆水，合為一跡。

衆生本性般若之智，亦復如是。

### 【C11】

小根之人，聞說此頓教，猶如大地草木根性自小者，若被大雨一沃，悉皆自倒，不能增長。

小根之人，亦復如是，有般若之智与大智之人亦无差別，因何聞法即不悟？緣邪見障重，煩惱根深。

猶如大雲盖覆於日，不得風吹，日無能現。

般若之智，亦无大小，為一切衆生自有。

迷心外脩覓仏，未悟自性，即是小根人。

聞其頓教，不信外脩，但於自心，令自本性常起正見，一切邪見煩惱塵勞衆生，當時盡悟。

猶如大海，納於衆流，小水大水合為一跡，即是見性。

內外不住，來去自由，能除執心，通達无碍，心脩此行，即与《般若波羅蜜經》本无差別。

### 【C12】

一切經書及文字、小大二乘、十二部經，皆因人置，因智惠性故，{方}能建立，若无{世}人，一切万法本亦不有，故知万法本從人興，一切經書因人說有。

緣在人中，有愚有智。愚為{小人}，智為大人。

迷人問於智者，智人与愚人說法，令使愚者悟解心開，迷人若悟{解}心開，与大智人无別。

故知不悟，即佛是衆生；一念若悟，即衆生是佛。

故知一切万法盡在自身心中，何不從於自心，頓見真如本性。

### 【C13】

《菩薩戒經》云：「{本源}自性清淨。」識心見性，自成佛道。「即時豁然，還得本心。」

### 【C14】

善知識！我於忍和尚處一聞，言下大悟，頓見真如本性，是故以教法流行後代，令學道者頓悟菩提，各自觀心，令自本性頓悟。

### 【C15】

若{不}自悟者，須覓大善知識，示道見性。何名大善知識？解取上乘法，直示正路。

是大善知識，{有}大因緣，所為化道令得見佛，一切善法皆因大善知識能發起故。

三世諸佛十二部經{皆}在人性中，本自具有，不能自悟須得善知識示道見性。

若自悟者，不假外善知識。

若取外求善知識望得解脫，无有是處。

識自心內善知識，即得解脫。

若自心邪迷、妄念顛倒，外善知識即有教授，汝若不得自悟，當起般若觀照，剎那間妄念俱滅；即是自真正善知識，一悟即至佛地。

自性心地，以智惠觀照，內外明徹，識自本心。

若識本心，即是解脫；既得解脫，即是般若三昧，悟般若三昧即是无念。

### 【C16】

何名无念？无念法者，見一切法，不着一切法，遍一切處，不着一切處，常淨自性，使六賊從六門走出，於六塵中，不離不染，來去自由，即是般若三昧，自在解脫，名无念行。

莫百物不思，當令念絕，即是法縛，即名邊見。

悟无念法者，万法盡通。

悟无念法者，見諸佛境界。

悟无念頓法者，至佛位地。

### 【C17】

善知識！後代得吾法者，常見吾法身，不離汝左右。

善知識！將此頓教法門，同見同行，發願受持如事佛故，終身受持而不退者，欲入聖位，然須傳受，從上已來，默然而付，於法發大誓願，不退菩提即須分付。

### 【C18】

若不同見解，无有志願，在在處處勿妄宣傳，損彼前人，究竟无益。

若愚人不解，謗此法門，百劫千生，斷佛種性。

### 【L1】（德異本編號）

大師言：善知識！聽吾說《无相頌》，令汝迷者罪滅，亦名《滅罪頌》。

頌曰：

愚人修福不修道，謂言修福而是道。

布施供養福无邊，心中三業元來在。

若將修福欲滅罪，後世得福罪元造。

若解向心除罪緣，各自性中真懺悔。

若悟大乘真懺悔，除邪行正即无罪。

學道之人能自觀，即與悟人同一例。

大師今傳此頓教，願學之人同一躰。

若欲當來覓法身，三毒惡緣心中洗。

努力修道莫悠悠，忽然虛度一世休。  
若遇大乘頓教法，虔誠合掌志心求。

【D3】（德異本編號）

大師說法了，韋使君、官寮、僧眾道俗，讚言無盡，昔所未聞。

【功德淨土品】

【E1】（德異本編號）

使君禮拜白言：「和尚說法實不思議，弟子當有少疑，欲{問}和尚，望和尚大慈大悲為弟子說。」

大師言：「有疑即問，何須再三。」

使君{曰：「此}法可不是西國第一祖達磨祖師宗旨？」

大師言：「是。」

【E2】

{使君曰}：「弟子見說，達磨大師〔化梁武帝〕，帝問達磨：朕一生已來，造寺、布施、供養有功德否？達磨答言：並無功德。武帝惆悵，遂遣達磨出境。

未審此言，請和尚說。」

六祖言：「實無功德，使君勿疑達摩大師言。武帝著邪道，不識正法。」

使君問：「何以無功德？」

和尚言：「造寺、布施、供養只是修福，不可將福以為功德。

功德在法身，非在於福田。

自法性有功德，平直是德，佛性外行恭敬。

若輕一切人，吾我不斷，即自無功德。自性虛妄，法身無功德。

念念行平等{直}心。德即不輕。常行於敬。

自修身即功，自修心即德。功德自心作。福與功德別。

武帝不識正理，非祖大師有過。」

【E3】

使君禮拜，又問：「弟子見僧俗常念阿彌陀佛，願往生西方。請和尚說，得生彼否？望為破疑。」

【E4】

大師言：「使君聽！惠能與說。

世尊在舍衛城，說西方引化，經文分明，去此不遠。

只為下根說近，說遠只緣上智。

人有兩種，法無兩般。迷悟有殊，見有遲疾。

迷人念佛生彼，悟者自淨其心，所以佛言：隨其心淨，則佛土淨。

使君！東方但淨心無罪，西方心不淨有愆。

迷人願生東方、生西者，所在處並皆一種。

心地但無不淨，西方去此不遠。心起不淨之心，念佛往生難到。

除{十}惡即行十萬，無八邪即過八千，但行{直}心，到如彈指。

使君！但行十善，何須更願往生？不斷十惡之心，何佛即來迎請？

若悟無生頓法，見西方只在剎那，不悟頓教大乘，念佛往生路遠，如何得達？」

六祖言：「惠能與使君移西方剎那間，目前便見，使君願見否？」

### 【E5】

使君禮拜：「若此得見，何須往生？願和尚慈悲，為現西方，大善！」

大師言：「一時見西方，無疑即散！」

大眾愕然，莫知何是？

### 【E6】

大師曰：「大眾！大眾作意聽！」

世人自色身是城，眼、耳、鼻、舌、身即是城門，外有六門，內有意門，心即是地，性即是王。

性在王在，性去王無，性在身心存，性去身壞。

佛是自性作，莫向身{外}求。

自性迷，佛即眾生。自性悟，眾生即是佛。

慈悲即是觀音，喜捨名為勢至，能淨是釋迦，平直即是彌勒。

人我即是須彌，邪心即是海水，煩惱即是波浪，毒心即是惡龍，塵勞即是魚鱉，虛妄即是神鬼，三毒即是地獄，愚癡即是畜生。

{常行}十善，即是天堂。無我人，須彌自倒。

除邪心，海水竭。煩惱無，波浪滅。毒害除，魚龍絕。

自心地上，覺性如來施大惠智光明，照耀六門清淨，照破六欲諸天。

下照三毒若除，地獄一時消滅。內外明徹，不異西方。

不作此修，如何到彼？」

座下聞說，讚聲徹天。應是迷人，了然便見。

使君禮拜，讚言：「善哉！善哉！普願法界眾生，聞者一時悟解。」

### 【E7】

大師言：「善知識！若欲修行，在家亦得，不由在寺。」

在寺不修，如西方心惡之人；在家若修行，如東方人修善。  
但願自家修清淨，即是西方。」

【E8】

使君問：「和尚！在家如何修？願為指授。」

【E9】

大師言：「善知識！惠能与道俗作《无相頌》，盡誦取，依此行修，常与惠能一處无別。」

頌曰：

說通及心通，如日處虛空，惟傳頓教法，出世破邪宗。  
教即无頓漸，迷悟有遲疾，若學頓法門，愚人不可悉。  
說即雖万般，合理還歸一，煩惱暗宅中，常須生惠日。  
邪來因煩惱，正來煩惱除，邪正悉不用，清淨至无餘。  
菩提本清淨，起心即是妄，淨性於妄中，但正除三障。  
世間若修道，一切盡不妨，常見在己過，与道即相當。  
色類自有道，離道別覓道，覓道不見道，到頭還自懊。  
若欲覓真道，行正即是道，自若无正心，暗行不見道。  
若真修道人，不見世間過，若見世間非，自非却是左。  
他非我不非，我非自有過，但自去非心，打破煩惱碎。  
若欲化愚人，自須有方便，勿令彼有疑，即是菩提見。  
法元在世間，於世出世間，勿離世間上，外求出世間。  
邪見在世間，正見出世間，邪正悉打却。  
此但是頓教，亦名為大乘，迷來经累劫，悟即剎那間。

【F1】（德異本編號）

大師言：「善知識！汝等盡誦取此偈，依偈修行，去惠能千里常在能邊；此不修，對面千里遠。

各各自修，法不相待，衆人且散，惠能歸漕溪山。

衆生若有大疑，來彼山間，為汝破疑，同見佛性。」

【F2】

合座官寮、道俗，禮拜和尚，无不嗟嘆：「善哉大悟！昔所未聞，嶺南有福，生佛在此，誰能得知！」

一時盡散。

## 【參請機緣品】

### 【1a】志誠

大師住漕溪山，韶廣二州行化四十餘年。若論門人，僧之与俗，三五千，說不可盡。若論宗旨，傳授《壇經》，以此為依約。若不得《壇經》，即无稟受，須知法處、年月日、姓名，遞相付囑。

无《壇經》稟承，非南宗弟子也。未得稟承者，雖說頓教法，未知根本，修不免諍。但得法者，只勸修行。諍是勝負之心，与道違背。

世人盡傳南能{北}秀，未知根本事由，且秀禪師於南荆府堂陽縣玉泉寺住持修行。惠能大師於韶州城東三十五里漕溪山住。法即一宗，人有南{北}，因此便立南北。何以漸頓？法即一種，見有遲疾；見遲即漸，見疾即頓。法无漸頓，人有利鈍，故名漸頓。

### 【1b】

神秀師常見人說，惠能法疾，直{指}見路。

秀師遂喚門人志誠曰：「汝聰明多智，汝与吾至漕溪山，到惠能所禮拜，但聽莫言吾使汝來，所聽得意旨記取，却来与吾說。看惠能見解，与吾誰疾遲。汝第一早來，勿令吾恠。」

### 【1c】

志誠奉使歡喜，遂半月中間即至漕溪山，見惠能和尚，禮拜即聽，不言來處。

志誠聞法，言下便悟，即契本心，起立即禮拜白言：和尚！弟子從玉泉寺來，秀師處不得契悟，聞和尚說，便契本心。和尚慈悲，願當教示。

### 【1d】

惠能大師曰：汝從彼來，應是細作。

志誠曰：不是。

六祖曰：何以不是？

志誠曰：未說時即是，說了即不是。

六祖言：煩惱即是菩提，亦復如是。

### 【1e】

大師謂志誠曰：吾聞汝禪師教人，唯傳戒定惠，汝和尚教人戒定惠如何？當為吾說。

志誠曰：秀和尚言戒定惠：諸惡不作名為戒，諸善奉行名為惠，自淨其意名為定，此即名為戒定惠。彼作如是說，不知和尚所見如何？

惠能和尚答曰：此說不可思議，惠能所見又別。

### 【1f】

志誠問：何以別？

惠能答曰：見有遲疾。

志誠請和尚說所見戒定惠。

大師言：汝聽吾說，看吾所見處：

心地无疑{是}自性戒，心地无乱是自性定，心地无癡是自性惠。

### 【1g】

大師言：汝師戒定惠，勸少根智人。吾戒定惠，勸上智人。

得悟自{性}，亦不立戒定惠。

### 【1h】

志誠言：請大師說不立如何？

大師言：自性无非、无亂、无癡，念念般若觀照，當離法相，有何可立？自性頓修，{亦無}漸次，所以不立。

志誠禮拜，便不離漕溪山，即為門人，不離大師左右。

## 【2a】法達

又有一僧名法達，常誦《妙法蓮華經》七年，心迷不知正法之處，來至漕溪山。

禮拜問大師言：弟子常誦《妙法蓮華經》七年，心迷不知正法之處，經上有疑，大師智惠廣大，願為除疑。

### 【2b】

大師言：法達！法即甚達，汝心不達。經上无疑，汝心自邪而求正法。吾心正定即是持經。吾一生已來，不識文字。

汝將《法華經》來，對吾讀一遍，吾聞即知。

法達取經到，對大師讀一遍。六祖聞已即識佛意，便與法達說《法華經》。

### 【2c】

六祖言：法達！《法華經》无多語，七卷盡是譬喻因緣。如來廣說三乘，只為世人根鈍。经文分明，无有餘乘唯一佛乘。法達！汝聽一佛乘，莫求二佛乘，迷却汝性。經中何處是一佛乘？吾與汝說。經云：諸佛世尊，唯以一大事因緣故，出現於世。已上十六字是正法。

{此}法如何解？此法如何修？汝聽吾說。

人心不思，本源空寂，離却邪見，即一大事因緣。

內外不迷，即離兩邊。

外迷着相，內迷着空，於相離相，於空離空，即是不迷。

若悟此法，一念心開，出現於世。心開何物？開仏知見。仏猶覺也，分為四門：開覺知見，示覺知見，悟覺知見，入覺知見。

開示悟入，上一處入，即覺知見，見自本性，即得出世。

大師言：法達！吾常願一切世人，心地常自開佛知見，莫開衆生知見。世人心{邪}，愚迷造惡，自開衆生知見。

世人心正，起智惠觀照，自開佛知見。莫開衆生知見，開佛知見，即出世。

大師言：法達！此是《法{華}經》一乘法，向下分三，為迷人故，汝但依一佛乘。

#### 【2d】

大師言：法達！心行轉法華，不行法華轉；心正轉法華，心邪法華轉。開佛知見轉《法華》，開衆生知見被《法華》轉。

大師言：努力依法修行，即是轉經。

#### 【2e】

法達一聞，言下大悟，涕淚悲泣，白言：和尚！實未曾轉《法華》，七年被《法華》轉，已後轉《法華》，念念修行佛行。

大師言：即佛行，是佛。

其時聽人，无不悟者。

#### 【3a】智常

時有一僧，名智常。

#### 【3b】

來漕溪山，禮拜和尚，問四乘法義。智常問和尚曰：佛說三乘，又言取上乘。弟子不解，望為教示。

#### 【3c】

惠能大師曰：汝自身心見，莫着外法相，元无四乘法，人心量四等，法有四乘。

見聞讀誦是小乘。悟{法}解義是中乘。依法修行是大乘。

万法盡通，万行俱備，一切不離，但離法相，作无所得，是取上乘。乘是取上行義，不在口誦。

汝須自修，莫問吾也。

#### 【4a】神會

又有一僧，名神會，南陽人也。

#### 【4b】

至漕溪山禮拜，問言：和尚坐禪，見不見？

大師起把，打神會三下，却問神會：吾打汝，痛不痛？

神會答言：亦痛亦不痛。

六祖言曰：吾亦見亦不見。

神會又問大師：何以亦見亦不見？

大師言：吾亦見，常見自過患，故云亦見。亦不見者，不見天地人過罪，所以亦見亦不見也。汝亦痛亦不痛如何？

神會答曰：若不痛即同無情木石；若痛即同凡，即起於恨。

大師言：神會向前，見不見是兩邊，痛不痛是生滅，汝自性且不見，敢來弄人！

神會禮拜、禮拜，更不言。

#### 【4c】

大師言：汝心迷不見，問善知識覓路。

汝心悟自見，依法修行。

汝自迷不見自心，却來問惠能見否？

吾不自知，代汝迷不得。汝若自見，代得吾迷？

何不自修，問吾見否？

#### 【4d】

神會作禮，便為門人，不離漕溪山中，常在左右。

### 【唐朝徵詔】（無）

### 【法門對示品】

#### 【1a】

大師遂喚門人法海、志誠、法達、智常、智通、志徹、志道、法珍、法如、神會。

大師言：汝等拾弟子近前，汝等不同餘人，吾滅度後汝各為一方師。

#### 【1b】

吾教汝說法，不失本宗。舉三科法門，動用卅六對，出沒即離兩邊。說一切法，莫離於性相。

若有人問法，出語盡雙，皆取對法，來去相因，究竟二法盡除，更無去處。

### 【1c】

三科法門者，蔭、界、入。

蔭是五蔭。界，十八界是。入，十二入。

何名五蔭？色蔭、受蔭、想蔭、行蔭、識蔭是。

何名十八界？六塵、六門、六識。

何名十二入？外六塵、中六門。

何名六塵？色、聲、香、味、觸、法是。

何名六門？眼、耳、鼻、舌、身、意是。

{六塵觸六門}，法性起六識：眼識、耳識、鼻識、舌識、身識、意識。

自性含萬法，名為含藏識。

思量，即轉識生六識，出六門，{見}六塵，三六十八。

由自性邪，起十八邪。自性{正}，{起}十八正。

惡用即衆生，善用即仏。

用由何等？由自性對。

### 【1d】

外境無情有五：

天與地對，日與月對，暗與明對，陰與陽對，水與火對。

語與言對，法與相對，有十二對：

有為無為對，有色無色對，有相無相對，有漏無漏對，色與空對，動與靜對，清與濁對，凡與聖對，僧與俗對，老與少對，大大與少少對，長與短對，高與下對。

自性起用對，有十九對：

邪與正對，癡與慧對，愚與智對，亂與定對，戒與非對，直與曲對，實與虛對，嶮與平對，煩惱與菩提對，慈與害對，喜與瞋對，捨與慳對，進與退對，生與滅對，常與無常對，法身與色身對，化身與報身對，躰與用對，性與相對，有情與無情對。

言語與法相對，有十二對，內外境有無五對，{自性起用有十九對}，都合成三十六對也。

### 【1e】

此三十六對法，解用通一切經，出入即離兩邊。

如何自性起用三十二對？

共人言語，出外於{相}離相，入內於空離空。

着空則惟長无明，着相惟邪見。

謗法直言：『不用文字』。

既云不用文字，人不合言語。言語即是文字。自性上說空，語言本性不空，迷{人}自惑語言故。

暗不自暗，以明故暗。暗不自暗，以明變暗。以暗現明，來去相因。三十六對，亦復如是。

### 【1f】

大師言：十弟子！已後傳法，遞相教授一卷《壇經》，不失本宗。

不稟受《壇經》，非我宗旨。如今得了，遞代流行。

得遇《壇經》者，如見吾親授。

拾僧得教授已，寫為《壇經》，遞代流行，得者必當見性。

### 【付囑流通品】

大師先天二年八月三日滅度，七月八日喚門人告別。

### 【2a】

大師先天元年，於蘄州國恩寺造塔，至先天二年七月告別。

大師言：汝眾近前，吾至八月欲離世間。

汝等有疑，早問，為汝破疑，當令迷者盡，使汝安樂。

吾若去後，無人教汝。

法海等眾僧聞已，涕淚悲泣。

唯有神會，不動亦不悲泣。

### 【2b】

六祖言：神會小僧却得善{不善}等，毀譽不動。

餘者不得，數年山中，更修何道？

汝今悲泣，更{憂}阿誰？

憂吾不知去處？{吾}若不知去處，終不別汝。

汝等悲泣，即不知吾去處。

若知去處，即不悲泣。

性无生滅，无去无來。

汝等盡坐，吾与汝一偈《真假動靜偈》。

汝等盡誦取，見此偈，意与吾同，依此修行，不失宗旨。

僧眾禮拜，請大師留偈，敬心受持。

【2c】

偈曰：

一切无有真，不以見於真，若見於真者，是見盡非真。  
若能自有真，離假即心真，自心不離假，无真何處真。  
有性即解動，无情即不動，若修不動行，同无情不動。  
若見真不動，動上有不動，不動是不動，无情无佛種。  
能善分別相，第一義不動，若悟作此見，則是真如用。  
報諸學道者，努力須用意，莫於大乘門，却執生死智。  
前頭人相應，即共論佛義，若實不相應，合掌令勸善。  
此教本无諍，若諍失道意，執迷諍法門，自性入生死。

衆僧既聞，識大師意，更不敢諍，{各自攝心}，依法修行，一時禮拜，即知大師不久住世。

【3a】

上座法海向前言：大師！大師去後衣法當付何人？

大師言：法即付了，汝不須問。

吾滅後二十餘年，邪法{撩}乱，惑我宗旨。有人出来，不惜身命，定佛教是非，竖立宗旨，即是吾正法。

【3b】

{汝今須知}，衣不合傳。汝{若}不信，吾与誦先代五祖傳衣付法誦。  
若據第一祖達摩頌意，即不合傳衣，聽吾与汝頌。第一祖達摩和尚頌曰：

吾本来唐國，傳教救迷情，一花開五葉，結菓自然成。

第二祖惠可和尚頌曰：

本来緣有地，從地種花生，當本元无地，花從何處生。

第三祖僧璨和尚頌曰：

花種須因地，地上種花生，花種无生性，於地亦无生。

第四祖道信和尚頌曰：

花種有生性，因地種花生，先緣不和合，一切盡无生。

第五祖弘忍和尚頌曰：

有情來下種，无情花即生，无情又无種，心地亦无生。

第六祖惠能和尚頌曰：

心地含情種，法雨即花生，自悟花情種，菩提果自成。

能大師言：汝等聽吾作二頌取達摩和尚頌意，汝迷人依此頌修行，必當見性。

第一頌曰：

心地邪花放，五葉逐根隨，共造无明業，見被業風吹。

第二頌曰：

心地正花放，五葉逐根，隨共修般若惠，當來佛菩提。

六祖說偈已了，放衆生散。

門人出外思惟，即知大師不久住世。

【4a】

六祖後至八月三日，食後大師言汝等善坐，吾今共汝等別

【4b】

法海問言：此頓教法傳受，從上已來，至今幾代？

【4c】

六祖言：初傳受七仏。

釋迦牟尼仏第七、大迦葉第八、阿難第九、末田地第十、商那和修第十一、優婆掬多第十二、提多迦第十三、佛陁難提第十四、仏陁蜜多第十五、脇比丘第十六、富那奢第十七、馬鳴第十八、毗羅長者第十九、龍樹第二十、迦那提婆第廿一、羅睺羅第廿二、僧迦那提第廿三、

僧迦耶舍第廿四、鳩摩羅馱第廿五、闍耶多第廿六、婆修盤陁第廿七、摩拏羅第廿八、鶴勒那第廿九、師子比丘第卅、舍那婆斯第卅一、優婆堀第卅二、僧伽羅第卅三、須婆蜜多第卅四、南天竺國王子第三太子菩提達摩第卅五、唐國僧惠可第卅六、僧璨第卅七、道信第卅八、弘忍第卅九、惠能自身當今受法第四十。

大師言：今日已後遞相傳受，須有依約，莫失宗旨。

【4d】

法海又白：大師今去留付何法，令後代人，如何見佛？

【4e】

六祖言：汝聽！後代迷人，但識衆生，即能見佛，若不識衆生，覓佛万劫不得也。

吾今教汝識衆生見佛。更留《見真佛解脫頌》。

迷即不見仏，悟者即見。

法海願聞，代代流傳世世不絕。

六祖言：汝聽吾与汝說後代世人，若欲覓佛，但識衆生，即能識佛，即緣有衆生，離衆生无佛心。

迷即佛衆生，悟即衆生佛。愚癡佛衆生，智惠衆生佛。

心嶮佛衆生，平等衆生佛。

一生心若嶮，佛在衆生中。一念悟若平，即衆生自佛。

我心自有佛，自佛是真佛。自若无佛心，向何處求佛？

【4f】

大師言：汝等門人好住。

吾留一頌名《自性見真佛解脫頌》。

後代迷人，聞此頌意，即見自心自性真佛，与汝此頌，吾共汝別。

頌曰：

真如淨性是眞佛，邪見三毒是眞魔，  
邪見之人魔在舍，正見之人佛即過。  
性中邪見三毒生，即是魔王來住舍，  
正見忽除三毒心，魔變成佛真无假。  
化身報身及淨身，三身元本是一身，  
若向身中覓自見，即是成佛菩提因。  
本從化身生淨性，淨性常在化身中，  
性使化身行正道，當來圓滿真无窮。

婬性本身淨性因，除婬即无淨性身，  
性中但自離五欲，見性剎那即是真。  
今生若悟頓教門，悟即眼前見世尊，  
若欲修行云覓佛，不知何處欲求真。  
若能身中自有真，有真即是成佛因，  
自不求真外覓佛，去覓惣是大癡人。  
頓教法者是西流，救度世人須自修，  
今{報}世間學道者，不於此{見}大悠悠。

#### 【4g】

大師說偈已了，遂告門人曰：汝等好住，今共汝別，吾去已後，莫作世情悲泣而受人吊問錢帛，着孝衣即非聖法，非我弟子。  
如吾在日一種，一時端坐，但无動无靜，无生无滅，无去无來，无是无非，无住，坦然寂靜，即是大道。  
吾去後，但依法修行，共吾在日一種。  
吾若在世，汝違教法，吾住无益。  
大師云此語已，夜至三更，奄然遷化。  
大師春秋七十有六。  
大師滅度之日，寺內異香氤氳，經數日不散，山崩地動，林木變白，日月无光，風雲失色。  
八月三日滅度。

#### 【5a】

至十一月，迎和尚神座，於漕溪山葬。  
在龍龕之內，白光出現，直上衝天，三日始散。  
韶州刺史韋{璩}，立碑至今供養。

#### 【5b】

此壇經法海上座集，上座无常付同學道際，道際无常付門人悟真，悟真在嶺南漕溪山法興寺，見今傳授此法。  
如付此法，須得上根智深，信佛法，立大悲，持此經，以為稟承，於今不絕。  
和尚本是韶州曲江縣人也。

#### 【5c】

如來入涅槃，法教流東土，共傳无住，即我心无住。  
此真菩薩說，直實示行喻，唯教大智人，示旨於凡度。

誓修行，遭難不退，遇苦能忍，福德深厚，方授此法。  
如根性不堪，{材}量不得，雖求此法，{建}立不得者，不得妄付壇经。  
告諸同道者，令知{密}意。  
南宗頓教最上大乘壇经一卷

---

## 關於編校者

林崇安教授，台灣台中縣人，1947年生。美國萊斯大學理學博士（1974）。中央大學專任教授（1974-2000），曾於法光、圓光、中華佛研所兼授佛學課程。內觀教育禪林創辦人。  
佛學專長：內觀禪修、佛教邏輯、佛教宗派思想。

### ◎歷年佛學與禪修編著以 PDF 檔和影音頻道分享：

#### （1）林崇安教授文集 <http://www.ss.ncu.edu.tw/~calin/>

本網頁收集【佛法教材】有 120 冊，【佛法論文集】有 260 篇，【六祖壇經專集】有壇經原典和論文 50 篇。【科學哲學】有 23 篇文章。  
【內觀雜誌】共 120 期電子檔。

#### （2）林崇安教授 YouTube 影音頻道

1. 「佛法教材研習」共 63 檔，解說《雜阿含經論會編》的要義。
2. 「內觀教材研習」共 138 檔，解說佛教心理、內觀經文、禪修問答、佛教邏輯總綱、佛教史總綱、佛法複習等等。

### ◎內觀教育基金會網站和臉書

基金會網站 <http://www.insights.org.tw/>

臉書：搜尋「內觀教育禪林」、「林崇安」。

佛法教材系列 W6

書名：《六祖壇經敦煌本》

編校：林崇安教授

出版：桃園市內觀教育基金會

網址：<http://www.insights.org.tw>

倡印：內觀教育禪林

通訊：桃園市大溪區頭寮路 355 號之 5（內觀教育禪林）

出版日期：2021 年 3 月

歡迎倡印，免費結緣